

## ԱԳՈՒԼԻՍԻ ԺԱՐՏԱՐԱՊԵՏԱԿԱՆ ՀՈՒՇԱՐՁԱՆՆԵՐԸ

ԱՐԳԱՄ ԱՅՎԱԶՅԱՆ

Պատմական Հայաստանի Գողթն գավառի կենտրոն վաճառաշահ Ագուլիս քաղաքն ընդգրկում էր այժմյան Նախիջևանի Վերին և Ներքին Ագուլիս գյուղերի տարածքը: XVI—XIX դդ. ընթացքում Ագուլիսը հիմնականում բաժանված է եղել երկու մեծ թաղի՝ Վերին և Ներքին, որոնք ունեին 10 նշանավոր թաղամասեր (Վերին գետ, Վանքի թաղ, Նուրիջանենց մահլա, Խձաձոր, Մեյդանի կամ Մալեյի խուպան, Զիգ փուղ, Խշկաշեն և այլն)<sup>1</sup>:

Ագուլիսի ճարտարապետական հուշարձաններից շատ թե քիչ հայտնի է ս. Թովմա վանքը<sup>2</sup>: XIX դ. կեսերին Ագուլիսի հուշարձաններից համեմատաբար լավ վիճակում են եղել 10-ը<sup>3</sup>: Այժմ պատմական քաղաքի Վերին գետ թաղամասում կանգուն է ս. Ստեփանոս եկեղեցին, Վանքի թաղում՝ ս. Թովմա վանքը, քաղաքի կենտրոնական մասում՝ ս. Քրիստափոր եկեղեցին: Միջին փուղ թաղում՝ ավերակ է ս. Հակոբ Ալիան կամ «Ընձանաց լույս» եկեղեցին, իսկ ս. Քրիստափոր եկեղեցուց հարավ-արևմուտք՝ Ագուլիսի շուկայից մոտ 200 մ ներքև, գտնվում են ս. Շմավոն եկեղեցու ավերակները: Ս. Շմավոնից մոտ 250—300 մ դեպի հարավ-արևմուտք՝ անմիջապես ձորի լեռնալանջին է գտնվում ս. Հովհաննես-Մկրտիչ եկեղեցին, որը դարձյալ վնասված է: Նրանից մոտ 300 մ ներքև՝ «Փոքր սար» կոչված բլուրի վրա, կանգուն է ս. Հակոբ-Հայրապետ եկեղեցին: Ագուլիսի հարավ-արևելյան մասում, քաղաքից դուրս՝ լեռնալանջին, գտնվում են Մեծ Աստվածածին եկեղեցու ավերակները: Ստորին Ագուլիսում կամ Դաշտ-Ագուլիսում կանգուն է ս. Երրորդություն կամ «Երեք խորանի» կոչվող եկեղեցին, որին հյուսիսային կողմից կից է «Ամարային» եկեղեցին: Պատմական քաղաքի շրջակայքում, նրա տարբեր թաղամասերում ավերակ վիճակում են գտնվում նաև 2—3 եկեղեցիներ, 5—6 մատուռներ, բերդեր, կամուրջներ և այլ հուշարձաններ:

Ագուլիսի ճարտարապետական հուշարձաններն աչքի են ընկնում հետաքրքիր առանձնահատկություններով: Հատկապես ուշագրավ են հուշարձանների բազմախիստ գլխավոր խորանները: Հայաստանի ճարտարապետական հուշարձանների խորանների ավանդական ձևի՝ կիսաշրջանաձև հորինվածքի թվում Ագուլիսում հանդիպում ենք և՛ ուղղանկյուն (ս. Հակոբ-Հայրապետ), և՛ հնգանիստ (ս. Հովհաննես-Մկրտիչ), և՛ յոթանիստ (ս. Թովմա, «Ամարային», ս. Շմավոն) խորանների կիրառություն:

<sup>1</sup> Ե. Լալայան, Գողթն կամ Օրդուբատի դամ Վերին-Ագուլիսի ոստիկանական շրջան, Թիֆլիս, 1904, էջ 63—64:

<sup>2</sup> Ղ. Ալիշան, Սիսական, Վենետիկ, 1891, էջ 323—337, Ե. Լալայան, նշվ. աշխ., էջ 68—72: 1975—1977 թթ. հաճախակի լինելով Ագուլիսում, ուսումնասիրել և չափագրել ենք տեղի հուշարձանները, որոնց մի մասը ներկայացվում է սույն հոդվածում:

<sup>3</sup> И. Озаровский, Военное обозрение Закавказья, СПб., 1883, стр. 91.

Ուսումնասիրությունը ցույց է տալիս, որ Ագուլիսի այժմյան կանգուն և կիսականգուն պատմաճարտարապետական հուշարձանների մի մասը հիմնովի է վաղ միջնադարում և հիմնականում վերանորոգվել է XII—XIV դդ. և XVII—XVIII դդ.: Ագուլիսի ճարտարապետական հուշարձանների շարքում իր ճարտարապետությամբ աչքի է ընկնում ս. Թովմա հռչակավոր վանքը, որը զարեի շարունակ հանդիսացել է Գողթն գավառի եպիսկոպոսանիստն ու մշակութային կարևոր կենտրոնը: Աբրահամ Կրետացին ս. Թովմա վանքը որակավորել է որպես «հիանալի և զարմանալի տեսողաց»<sup>4</sup>: Ըստ վանքի տաճարի արևմտյան մուտքի բարավորի XVII դ. ընդարձակ արձանագրության.

«Բարդուղիմէոս ի հայս եկեալ,  
Զտուն տեառն նախ աստ հիմնարկեալ,  
Սուրբ Թովմայի առաքելոյն անուն կոչեալ,  
Գահ հաստատեալ:  
Կոմսի անուն զիւր աշակերտն  
Տեսուչ տեղւոյս զնա եղեալ.  
Որ եւ զտուն Գողթ գաւառիս  
.....  
Սուրբ Գրիգոր յորժամ եկեալ  
Ի առաքելոյն նսմոս տեաեալ  
Ձեռագրով նոյն հաստատեալ,  
Եւ նզովիւք ամրափակեալ,  
Յամի Տեառն ԳԾ եւ հինգ հասեալ,  
Լուսաւորչին պատճէն դրեալ  
Արձան գրիս, որ աստ եղեալ»<sup>5</sup>:

Ս. Թովմայի տաճարը, ինչպես նաև համալիրը, մի քանի անգամ վերանորոգվել է: Վանքապատկան շինությունների ուսումնասիրությունը ցույց է տալիս, որ դրանց մեծ մասը հիմնականում կառուցվել է XII—XIII դդ., որոնք ևս վերանորոգվել են, ավելացել են նոր շինություններ: Օրինակ, Ս. Թովմայի վանական համալիրը և նրա եկեղեցին 1636 թ. նորոգել է Մովսես կաթողիկոսի աշակերտ, ս. Թովմայի առաջնորդ Խաչատուր վարդապետը: Նա ճեպագրեց ի հիմանց զսուրբ ուխտս Թովմայի, բարձրաբերձ կամարակապ և գմբեթաձև՝ զսուրբ եկեղեցին, և բարձր պարսպով և չորեքանկինի խուցերով և մուղրախերով (խոհանոց.—Ա. Ա.) զարգարեաց. և բազում նեղութեամբ և շարչարանօք շինեաց»<sup>6</sup>: Ս. Թովմայի պարիսպները և վանական շինությունները 1668 թ. վերանորոգել է Խաչատուր վարդապետի հետնորդ Պետրոս վար-

<sup>4</sup> «Աբրահամ Կաթողիկոս Կրետացւոյ Պատմութիւն անցիցն իւրոյ եւ նաոր-Շահին պարսից», էջմիածին, 1870, էջ 77:

<sup>5</sup> Ս. Թովմայի այս և մյուս արձանագրությունները տե՛ս Յովհաննես Շահխաթունեանց, Ստորագրութիւն կաթողիկէ էջմիածնի և հինգ գաւառացն Արարատայ, հ. 2, էջմիածին, 1842, էջ 324—327, Ղ. Ալիշան, նշվ. աշխ., էջ 326—329, Ե. Լալայան, նշվ. աշխ., էջ 70—72, Հ. Ոսկյան, Վասպուրական—Վանի վանքերը, Բ մաս, Վիեննա, 1942, էջ 677—690: Արևմտյան մուտքի այս արձանագրությունից մեշ բերվող համավածը հրապարակում ենք մեր ընթերցմամբ:

<sup>6</sup> Ղ. Ալիշան, նշվ. աշխ., էջ 326—327:

դապետը<sup>7</sup>։ Ըստ ս. Թովմայի տաճարի արևմտյան ճակատի, զանգակատան հյուսիսային և հարավային կողմերում տեղադրված արձանագրությունների, տաճարը նորոգվել է նաև 1694—95 թթ.։ Ագուլիսում ընդօրինակված ձեռագրերից մեկի հիշատակարանում ևս նշված է, որ «...թվին ՌՃԽԳ (1694) շինեցաւ սբ Թովմայի առաքելոյն եկեղեցին. Ագուլեաց վանաց...»<sup>8</sup>։ Այսպիսով, պետք է եզրակացնել, որ դեռևս IV դ. հիմնարկված ս. Թովմա վանքը հիմնականում վերակառուցվել է XII—XIII դդ. և XVII դ.։ Գրչագիր աղբյուրներում ս. Թովման հիշատակվում է XIV դ.<sup>9</sup>։



Նկ. 1. Ագուլիսի ս. Թովմա տաճարի գմբեթը հարավ-արևմուտքից։


Ս. Թովմայի տաճարի (նկ. 1) կառույցը մեծ հետաքրքրություն է ներկայացնում միջնադարի վանական համալիրների ճարտարապետության ուսումնասիրման առումով։ Ս. Թովմա վանքը միջնադարյան մի շարք խոշոր համալիրների նման (Խոր-Վիրապ, Կնեանք, Տաթևի Մեծ անապատ, Աստապատի

<sup>7</sup> «Ջաբարիա Ագուլեցու օրագրությունը», Երևան, 1938, էջ 78։

<sup>8</sup> «Ցուցակ հայերէն ձեռագրաց Քավրիզի», կազմեց Զ. Աճառյան, Վիեննա, 1910, էջ 116։

<sup>9</sup> Երևանի Մ. Մաշտոցի անվան Մատենադարան, ձեռ. № 1571, ք. 285ր։

Կարմիր վանք, Լիմ անապատ և այլն) ունի ուղղանկյուն, կանոնավոր հատակագիծ, որի միակ տաճարը տեղադրված է վանական համալիրի մեջտեղում: Տաճարի շուրջը, քառանկյունի բարձր պարիսպների պարագծով, տեղադրված են համալիրի տնտեսական, բնակելի, օժանդակ և այլ շինություններ, որոնք տաճարից հեռու են 15—20 մ: Դրա շնորհիվ տաճարի կենտրոնական դիրքն ու պաշտամունքային դերն ավելի են շեշտվել:



Նկ. 2. Ագուլիսի ս. Թովմա տաճարի գլխավոր հատակագիծը  
(չափագրությունը Ա. Այվազյանի):

Տաճարը, որը քառամույթ գմբեթավոր բազիլիկա է, կառուցված է բազալտից և սրբատաշ կարմրերանգ քարերից՝ արևելք-արևմուտք առանցքով: Տաճարը բաղկացած է ընդարձակ և յոթանիստ խորանից, երկհարկանի զույգ ավանդատներից ու աղոթասրահից (նկ. 2): Ունի երեք գեղեցիկ կամարազարդ մուտքեր՝ արևմտյան, հյուսիսային և հարավային ճակատներում (վերջին երկուսը այժմ փակված են): Աղոթասրահի խաչաձև կտրվածքով չորս հաստահեղույս մույթերի վրա կանգնեցված է քարաշեն և գեղեցիկ, 12 պատուհաններով գմբեթը: Գեղեցիկ և լուսավոր ինտերյեր ունեցող այս տաճարի բեմի արևմտյան պատը, որն այժմ քանդված է, կառուցված է եղել մարմարյա քարերից: Խորանը, որի որմնախորշերն ունեն ձևավոր սյաքաձև կամարներ, լուսավորվում է արևելյան որմնով բացված խաչաձև գեղեցիկ լուսամուտով:

Ավագ խորանի աջ և ձախ կողմերում գտնվող երկհարկանի ավանդատներն ուղղանկյունաձև են։ Որմնախորշերն ունեն լայն բացվածքներ և ավարտվում են կիսաշրջանաձև կամարներով։ Հյուսիսային ավանդատան ներսում՝ հյուսիսային որմին և ավանդատան արևմտյան որմին կցված, անկյունային մասի քարե աստիճանները տանում են դեպի տաճարի վերնատունը, տանիքը, ավանդատան ծածկի և կառույցի այլ մասերում գտնվող հատուկ թաքստոցներն ու պահարանները։ Եկեղեցու հարավային ավանդատունը ծառայել է որպես թանգարան։

Ս. Թովմա վանքի տաճարի ներքին տարածքը ղարդարվել է բարձրարվեստ որմնանկարներով, որոնք 1680-ական թվականներին կատարել է հուսկավոր նկարիչ, բանաստեղծ ու երգասաց Նաղաշ Հովնաթանը<sup>10</sup>։ Դժբախտաբար տաճարի որմնանկարների մեծ մասը քայքայվել է։ XIX դ. վերջերին Մ. Փափազյանը մասնակիորեն նկարագրել է այդ որմնանկարների մի մասը և հրատարակել երկու լուսանկար<sup>11</sup>։ Այժմ ս. Թովմա վանքի տաճարում պահպանվել են գմբեթի, թմբուկի, գմբեթատակ մասերի, արևմտյան մուտքի և շորս մուկթերի վերին մասերի որմնանկարները։

Ս. Թովմայի տաճարը գեղեցիկ է նաև արտաքին տեսքով։ Այն հատկապես աչքի է ընկնում արևմտյան, հյուսիսային և հարավային ճակատներում գտնվող մուտքերի արտահայտիչ քանդակազարդերով ու պատկերաքանդակներով, բարավորների ընդարձակ արձանագրություններով, մուտքերի առջև կառուցված զանգակատներով։ Տաճարի արևմտյան մուտքը երիզված է բարձր կամարով և ունի գեղեցիկ քանդակազարդ գոտիներ։ Մուտքի բարավորից վերև՝ կամարի տակ, քառանկյուն շրջանակի մեջ, տեղադրված է «Թովմայի անհավատությունը» քանդակը (նկ. 3), ուր Քրիստոսը պատկերված է ամբողջ հասակով՝ մեծ խաչափայտը գրկած։ Նա աջ ձեռքը վեր է բարձրացրել և հայացքով Թովմային մատնացույց է անում գեղարդով խոցված իր աջ կողմը։ Թովման, որը պատկերված է նստած, հավաստիանալու համար աջ ձեռքով մեծ զգուշությամբ շոշափում է Քրիստոսի վերքը։ Բարձրաքանդակն է՛լ ավելի արտահայտիչ է նրա շուրջը երիզող Նաղաշ Հովնաթանի որմնանկարներով։ Բարձրաքանդակի վերևում աստծո պատկերն է, ձախ կողմում՝ Մագթադինեի կանգուն դիմապատկերը, իսկ աջում՝ Աստվածամոր կյանքից մի դրվագ։ Այս կոմպոզիցիոն պատկերումները մուտքի խորացող կամարի քանդակազարդերի հետ համահնչուն են, կապվում են մուտքի ճարտարապետության հետ և է՛լ ավելի գեղեցկություն ու հանդիսավորություն հաղորդում նրան։ Արևմտյան մուտքի մոնումենտալությունն ընդգծվում է նաև նրա բարավորի 9 տողանի ընդարձակ արձանագրությամբ։ Գեղեցիկ է եղել նաև այս մուտքի փայտյա դուռը (այժմ՝ խիստ վնասված)։ Քայքայված է նաև այդ դռան վերևի մասում գտնվող արձանագրությունը<sup>12</sup>։

Արեւմտյան մուտքի առջև սրբատաշ քարերով կառուցված է գեղեցիկ զանգակատուն, որի երկու մուկթերի կամարները նստած են եկեղեցու արևմտյան որմնամուկթերի վրա։ Այս զանգակատունը կառուցվել է 1831 թ., շուշիաբնակ

<sup>10</sup> Մ. Ղ ա ղ ա ռ յ ա ն, Հայ կերպարվեստը XVII—XVIII դդ., Երևան, 1974, էջ 150—151։

<sup>11</sup> Մ. Փ ա փ ա ղ յ ա ն, Հնույթյունք վանքերից, Գողթան դավառ, լուսանկարչական ալբոմ, Վաղարշապատ, 1891, № 348, 349։

<sup>12</sup> Ե. Լ ա լ ա յ ա ն, Նշվ. աշխ., էջ 70։

ագուլեցի Հախումյան տոհմի կողմից<sup>13</sup>, 1825 թ. հիմնարկված ազյուսակերտ զանգակատան տեղում: Այս զանգակատունը վերանորոգվել է 1904 թ.<sup>14</sup>



Նկ. 3. Ս. Թովմա տաճարի արևմտյան մուտքի բարձրաքանդակը և նազաշ Հովնաթանի որմնանկարները:

Գեղեցիկ քանդակազարդ գոտիներով են երիզված նաև տաճարի հյուսիսային և հարավային մուտքերը: Տաճարի հյուսիսային մուտքի 8 տողանոց արձանագիր բարավորից վերև՝ մուտքի խորաքանդակ բարձր կամարի տակ, քանդակված է Պողոս առաքյալի բարձրաքանդակը. նա ձախ ձեռքին բռնել է դավազան-խաչափայտը, աջ ձեռքին՝ օձ, իսկ թևի տակ ունի ավետարան: Այս մուտքի զանգակատունը ևս կառուցված է սրբատաշ քարերից, երկու մուկների հորինվածքով, որի ծածկում կանգնեցված է եղել վեց մուկթանի փոքրիկ ոտտոնդան (փոքրիկ գմբեթը):

Գեղեցիկ է նաև տաճարի հարավային մուտքը, որը ևս օժտված է բարձրաքանդակով և արձանագրությամբ: Այս մուտքի մոտ չորս մուկթանի հորինվածքով, սրբատաշ քարերով կառուցված է գեղեցիկ մատուռ-դամբարան, որը մուտքից մոտ մեկ մետր դեպի արևմուտք է տեղադրված և նույնքան էլ հեռու է գտնվում եկեղեցու հարավային որմից: Այս մատուռի ծածկում կանգնեցված է քառամուկ փոքրիկ ոտտոնդան: Ամենայն հավանականությամբ այն ս. Թովմա վանքի եպիսկոպոս Խաչատուր վարդապետի շիրիմի վրա վանքի առաջնորդ Պետրոս վարդապետի 1666 թ. կառուցած մատուռն է: Այդ է վկայում նաև Զ. Ագուլեցին, նշելով, որ Պետրոս վարդապետը Խաչատուր

<sup>13</sup> Մ. Փափազյան, Նշվ. աշխ., № 346, Ե. լալայան, Նշվ. աշխ., էջ 70:

<sup>14</sup> Հ. Ոսկյան, Նշվ. աշխ., էջ 679:

վարդապետի շիրիմի վրա ստաշած քարով մեծ մատուռ շինեց եկեղեցույ չա-  
րաւու կողմն»<sup>15</sup>:

Ս. Թովմա վանքն ունի ավելի քան 50 բնակելի և կոմունալ կառույցներ,  
որոնց մեծ մասը երկհարկանի են՝ կառուցված սրբատաշ քարով ու թրծած  
աղյուսով: Վանքի քառանկյուն և բարձր (6—7 մ) պարիսպն ունի 6 հզոր աշ-  
տարակներ, և վանական համալիրը հզոր ամրոցի տպավորություն է թողնում:

Ս. Թովմա վանքն իր գլխավոր հատակագծով և ճարտարապետական լու-  
ծումներով ուրույն տեղ ունի հայ միջնադարյան ճարտարապետության հա-  
մալիրների շարքում:

Ագուլիսի ս. Քրիստափոր եկեղեցին ըստ ավանդության և Զ. Ագուլեցու  
հաղորդած տեղեկությունների. «...Թաթէոս առաքեալն էր շինած. եկավ մինչևի  
թվին ՌՀԹ վերստին ախպէս ին շինել... Սորայ առաջի շինողն Քրիստոսի  
առաքեալքն էին: Սոցա յետնայ Վերի թաղի խոշայ Գուլնազարն, Քիշիբէկն,  
Մալխանն վերակացու եղէն, ժողովրդեան փողով շինեցին, մինչև էհաս այսմ  
ամի (1671 թ.—Ա. Ա.)»<sup>16</sup>: Աղբյուրներում ս. Քրիստափորը հիշատակվում է  
XV դ. կեսերից<sup>17</sup>: 1682 թ. այդ եկեղեցու գրչատանը «Պատմութիւն Հրեից»-ն է  
ընդօրինակել նաև նաղաշ Հովնաթանը<sup>18</sup>:



Նկ. 4. Ագուլիսի ս. Քրիստափոր եկեղեցին:

Ս. Քրիստափոր եկեղեցին (Նկ. 4), որն իր հիմնարկությունից հետո մի  
քանի անգամ վերակառուցվել է, ունի քառամույթ գմբեթավոր բազիլիկայի

<sup>15</sup> Զ. Ագուլեցի, Նշվ. աշխ., էջ 64, հմմտ. Ե. Լալայան, Նշվ. աշխ., էջ 72:

<sup>16</sup> Նույն տեղում, էջ 95—96:

<sup>17</sup> Եժեղարի հայերեն ձեռագրերի հիշատակարաններ, մասն առաջին (1401—1450 թթ.),  
կազմեց՝ Լ. Խաչիկյան, Երևան, 1955, էջ 605:

<sup>18</sup> Ղ. Ալիշան, Նշվ. աշխ., էջ 329, 331:

հորինվածք: Այն կազմված է ավագ խորանից, զույգ ավանդատներից և լուսավոր ու բարձր ինտերյեր ունեցող աղոթասրահից: Վերջինիս շորս խաչաձև կտրվածքով մույթերի վրա կանգնեցված է վեհասլաց ու աղյուսաշար գմբեթը: Մինչև 1920—1925 թթ. եկեղեցու ծածկում՝ գմբեթից դեպի արևմուտք, եղել է 4 մույթերի հորինվածքով զանգակատան ռոտոնդան: Եկեղեցին ունի երեք կամարակապ և խորաքանդակ զարդագոտիներով երիզված մուտքեր՝ արևմրտյան, հյուսիսային և հարավային ճակատներում (վերջին երկուսը այժմ փակված են): Արևմտյան մուտքի բարավորից վերև տեղադրված է մանուկ Հիսուսին գրկած թագակիր Աստվածամոր պատկերաքանդակը, որը ս. Քրիստափոր եկեղեցու 1671—1675 թթ. վերակառուցման ժամանակ Ձ. Ագուլեցին է քանդակել տվել<sup>19</sup>: Այդ մուտքի փայտյա դուռը քանդակազարդ է: Եկեղեցու հյուսիսային մուտքի կամարի տակ, քառանկյունի շրջանակի մեջ է առնված գեղեցիկ զարդաքանդակ և խաչ, իսկ հարավային մուտքի բարավորից վերև ընկած տարածությունը զարդարված է քառանկյան և ապա շրջանագծի մեջ առնված ոճավորված խաչի պատկերաքանդակով: Եկեղեցու հարավային, հյուսիսային և արևմտյան ճակատներում տեղադրված են XVII դ. 22 արձանագիր քարեր և խաչքարեր: Նշված եկեղեցու հարավային ճակատին կից պարսպապատ և բավականին ընդարձակ տարածքում նկատելի են մի քանի շինությունների հետքեր: 1867 թ. սկսած՝ աղտեղ գործել է Ագուլիսի օրիորդաց դպրոցը, որը կոչվել է Վերին Ագուլյաց Հայկանուշյան օրիորդաց ուսումնարան<sup>20</sup>: Եկեղեցու հարավային մուտքի առջև կան XVIII—XIX դդ. մի քանի տապանաքարեր:

Եկեղեցուց մոտ 100—150 մ հարավ եղել են եկեղեցական շինություններ, որոնք այժմ ավերված են: Արևմտյան ճակատի առջև, նրա ընդլայնական երկարությամբ, շարված է 3—3,5 մ բարձրությամբ պատնեշ-պատ, որի հյուսիսային անկյունում գտնվում է ս. Քրիստափորի հորդահոս, կամարակապ աղբյուրը:

Նկարագրվող եկեղեցու ինտերյերը 1680-ական թվականներին որոնանկարել է Նաղաշ Հովնաթանը: Այժմ պահպանվել են ավագ խորանի, գմբեթի և մույթերի վերին հատվածների նկարազարդումների առանձին բեկորներ, որոնք ոճական առումով հիշեցնում են ս. Թովմա վանքի տաճարի որմնանկարների արվեստը: Ս. Քրիստափոր եկեղեցու որմնանկարների բազմերանգ բուսական մոտիվների թվում կան նաև երկրաչափական զարդեր: Այս եկեղեցում Նաղաշ Հովնաթանը նկարել է նաև դիմապատկերներ, որոնց հետքերը այժմ հազիվ են նշմարվում:

Եկեղեցու այժմյան շինությունը վերանորոգվել է XVII դ. երկրորդ կեսին: Այդ են վկայում ինչպես Ձ. Ագուլեցու տեղեկությունները<sup>21</sup>, այնպես էլ եկեղեցու արձանագրությունները: Ձ. Ագուլեցու տեղեկություններով, ս. Քրիստափոր եկեղեցին 1670 թ. փրվելուց հետո նրա վերանորոգումը սկսվել է 1671 թ. և ավարտվել 1675 թ. գարնանը: Եկեղեցու վերանորոգմանը մասնակցել են Վասպուրականից հրավիրված ավելի քան 40 վարպետներ, ինչ-

19 Ձ. Ագուլեցի, նշվ. աշխ., էջ 96:

20 Պ. Պոռյան, Վերին Ագուլյաց երկու սեռից ուսումնարանների բացվելը և կանոնադրությունը, Մոսկվա, 1868, էջ 25, 35—37:

21 Ձ. Ագուլեցի, նշվ. աշխ., էջ 95—97:

պես նաև ագուլեցի ու շուղայեցի վարպետներ, որոնց աշխատանքները ղեկավարել է Մոկսու «մեծ ուստէն»՝ ճարտարապետը 1671 թ. ս. Թովմա վանքում ընդօրինակված մի գրչագիր ժողովածուի համաձայն՝ 1671 թ. «նորոգման սկիզբն եղև եկեղեցւոյն...»<sup>22</sup>։ Զ. Ագուլեցու մեկ այլ տեղեկությունից իմանում ենք, որ ս. Քրիստափոր եկեղեցին նորոգվել է նաև 1630 թ., ագուլեցի Ղօղաղ վարպետի կողմից<sup>23</sup>։

Ս. Քրիստափոր եկեղեցին, որն իրավամբ մայր եկեղեցի է անվանվել, Ագուլիսի ճարտարապետական նշանավոր հուշարձաններից է։

Ագուլիսի ս. Շմավոն եկեղեցու մասին սկզբնաղբյուրներում (վիմագիր և գրավոր) տեղեկություններ չեն պահպանվել։ Ս. Շմավոնը (նկ. 5), որը կառուցված է բարձրագույն հարթ վայրում, մեծ ու սրբատաշ քարաշեն գեղեցիկ եկեղեցի է եղել։ Այժմ կիսախարխուլ վիճակով կանգուն են միայն եկեղեցու



Նկ. 5. Ագուլիսի ս. Շմավոն եկեղեցու տեսքը։

ավագ խորանի առջև գտնվող 2 մույթերը, ավագ խորանի ծածկի մի հատվածը և եկեղեցու արևելյան որմը։ Ս. Շմավոն եկեղեցու ավերակներից դատելով՝ այն քառամույթ հորինվածքով գմբեթակիր հուշարձան է եղել՝ բաղկացած ավագ խորանից, երկհարկանի զույգ ավանդատներից և աղոթասրահ-

<sup>22</sup> Մ. Ս մ բ ա տ յ ա ն ց, Նկարագիր սուրբ Կարապետի վանից Երնշակա և շրջակայից նորա, Տփղիս, 1904, էջ 203։

<sup>23</sup> Զ. Ա գ ու լ ե ց ի, նշվ. աշխ., էջ 149։

հից, Եկեղեցու արևմտյան և հարավային ճակատներում նկատելի են մուտքերի հետքեր:

Նշված եկեղեցու ճարտարապետական հորինվածքում հետաքրքրական է հատկապես նրա յոթանիստ ավագ խորանը, որն իր կազմությամբ հար և նման է ս. Թովմա վանքի տաճարի ավագ խորանին: Մ. Շմավոն եկեղեցում նկատելի են նաև որմնանկարների հետքեր: Հայտնի է, որ եկեղեցուն նվիրված Աջր ունեցել է հետևյալ արձանագրությունը. «Յիշատակ է սուրբ Աջս Վարդանի դստեր Դժխանին, և իւր որդի Ստեփաննոսին, և յիշատակ է Վարդանի որդի Զօհրապին, իւր որդւոցն Օհանիսին, Յակոբին և Շմաւոնին, այս է Աջ սուրբ Առաքելոյն Շմաւոնի, թուին ՌՃԿԶ (1717)»<sup>24</sup>: Դատելով ս. Շմավոն եկեղեցու ավերակներից և հատկապես ծածկի-տարածական հատկանիշներից, կարելի է եզրակացնել, որ այս եկեղեցին ևս կառուցվել է մոտավորապես XII—XIII դդ. և վերանորոգվել XVII դ.:

Կիսավեր վիճակում է նաև Ագուլիսի ս. Հովնաճենս-Մկրտիչ եկեղեցին: Քանդված է եկեղեցու հյուսիսային որմի ընդերկայնական մասի բարձրությամբ կեսը, ավերված են այդ ճակատում, հյուսիս-արևմտյան անկյունում գտնվող միակ մուտքը, ծածկի հյուսիսային հատվածի մի մասը: Ինտերյերում վնասված են զույգ ավանդատների մուտքերի վերին մասերը, երկրորդ հարկի ավանդատների արևմտյան ճակատների ցածրագիւր որմերը, դեպի այդ ավանդատներ տանող քարե աստիճանների շարվածքները և այլ հատվածներ: Կիսավեր են նաև եկեղեցու պարիսպը և նրա համալիրի շինությունները:

Ս. Հովհաննես-Մկրտիչ եկեղեցին, ինչպես նշում է Զ. Ագուլեցին, եղել է ներքին թաղի գլխավոր եկեղեցին<sup>25</sup>: Մ. Թադևոսյանը սխալմամբ նշել է, որ «Վերնոյ թաղի եկեղեցին է սուրբ Յովհաննէսը, իսկ ներքնոյն՝ Աստվածածինը»<sup>26</sup>: Սա, ըստ երևույթին, արդյունք է Մեծ Աստվածածին եկեղեցու տեղադրության, որը ս. Հովհաննես-Մկրտիչից իրոք որ բավականի ներքև է գտնվում և Ագուլիսի վաղեմի տարածքի՝ շահաստանի, ներքին մասի եկեղեցին է հանդիսացել: Այն թաղամասը, ուր գտնվում է ս. Հովհաննես-Մկրտիչը, կոչվել է «Խճաճոր, որ է ներքի թաղն...»<sup>27</sup>: Եկեղեցու և նրա օժանդակ շինությունների ուսումնասիրությունը վկայում է, որ այս հուշարձանի նախկին շինությունը կառուցված է եղել ավելի վաղ շրջանում և վերանորոգվել է XVII դ.:

Ս. Հովհաննես-Մկրտիչ եկեղեցին բաղկացած է ավագ խորանից, երկ-հարկանի զույգ ավանդատներից և ընդարձակ աղոթասրահից (նկ. 6): Վերջինիս ութանիստ կտրվածքով չորս հաստահողույս մույթերի կամարների վրա կանգնեցված է 8 լուսամուտներով աղյուսաշար զմբեթը: Ինչպես նշվեց, այժմ ավերված է նաև եկեղեցու մուտքը, որի հորինվածքի մասին պատկերացում կարելի է կազմել գերմանացի նկարիչ Քեպտների նկարի միջոցով<sup>28</sup>: Ըստ այդ նկարի, ս. Հովհաննես-Մկրտիչ եկեղեցու մուտքը ունեցել է քառ-

<sup>24</sup> «Ճառքաղ», Մոսկվա, 1862, էջ 87 (տողատակ): Ղ. Ալիշանը հրատարակել է նաև ս. Շմավոնի 3 արձանագրությունները՝ մեկը 1458 և երկուսը՝ 1563 տարեթվերով (Նշվ. աշխ., էջ 329—330):

<sup>25</sup> Զ. Ագուլեցի, Նշվ. աշխ., էջ 63, 65, 130:

<sup>26</sup> Մ. Թադևոսյան, Ճանապարհորդություն ի Հայս, հ. 1, Կալկաթա, 1847, էջ 254:

<sup>27</sup> Զ. Ագուլեցի, Նշվ. աշխ., էջ 92:

<sup>28</sup> Ղ. Ալիշան, Նշվ. աշխ., էջ 333, նկ. 99:


անկյուն բացվածք, առանց կամարի: Մուտքից վերև, շարվածքի երկրորդ շարքում տեղադրված է եղել մի արձանագիր քար՝ «թ. ՌՃԽԳ» (1694): Մուտքն ունեցել է գեղեցիկ փայտյա դուռ, որը «բազմադրուագ, մանր մասամբ փայտից, սատափով և փղոսկրի կիտուածեալ, յորում գրուած յամի 1682.

Յիշատակ է դուռնս այս Հախումին

Եւ կողակցին եւ որդոց նոցին,

Աստուած ողորմի աշխատանքացն. թվ. ՌՃԼԱ»<sup>29</sup>:

Ս. Հովհաննես-Մկրտիչ եկեղեցու և ս. Թովմա վանքի տաճարի արևմտյան մուտքի դռներն այնքան նման են, որ կարելի է ենթադրել, թե դրանք նույն վարպետի աշխատանքի արդյունք են:



Նկ. 6. Ագուլիսի ս. Հովհաննես-Մկրտիչ եկեղեցու հատակագիծը (չափադրությունը Ա. Ավագյանի):

Նկարագրվող եկեղեցին (նկ. 7) կառուցված է սրբատաշ քարերից և որձաքարերից: Արտաքին տեսքը համեստ է, նույնիսկ անշուք: Եկեղեցու արեւելյան ճակատի արտաքին հատվածը շարված է թրժած աղյուսով: Ինչպես եկեղեցին, այնպես էլ նրան կից շինություններն ունեցել են քառանկյուն բարձր պարիսպներ՝ հյուսիսից և հարավից դարպասներով: Եկեղեցու ավագ խորանի հորինվածքը հնգանիստ է, որի որմնախորշերը բավական խոր են և ավարտվում են սլաքաձև կամարներով: Խորանի հյուսիսային և հարավային անկյունային մասերում՝ որմնախորշերից վերև, ընդգծվում են լայն կամարներով որմնադարձերը և այդ կամարների վերևի մասերում տեղադրված զարդանախշերը:

Եկեղեցու երկրորդ հարկի ավանդատները, հակառակ առաջին հարկի ավանդատների և ավագ խորանի կազմության, արևելյան մասում ունեն կի-

<sup>29</sup> Նույն տեղում, Ե. Լալայան, նշվ. աշխ., էջ 65:

սաշրջանաձև արսիդ: Երկրորդ հարկի խորանները լուսավորվում են արևելյան որմնում գտնվող պատուհաններով, որոնցից 30—35 սմ վերև, լրացուցիչ լուսավորության համար, բացված են մեկական շրջանաձև լուսամուտներ ևս: Երկրորդ հարկի խորաններն արևմտյան մասերում ունեցել են ցածրադիր (60 սմ) պատ, որի ամբողջ ճակատը բաց է և խորաններն օրգանապես կապվել են աղոթասրահի հետ: 2-րդ հարկ բարձրացել են առաջին հարկի ավանդատների մուտքերի և ավագ խորանի միջև կառուցված քարե աստիճանների



Նկ. 7. Ագուլիսի ս. Հովհաննես-Մկրտիչ եկեղեցու տեսքը:

միջոցով: Կան մի քանի վերանորոգումների հետքեր, որոնցից երկուսի մասին տեղեկություններ է պահպանել Ձ. Ագուլեցին, որոնց համաձայն ագուլեցի վարպետ Սեթյան մահտեսի Մելքումը «այսմ թվիս (1612 թ.—Ա. Ա.) նձայձորու սուրբ Ովանէս եկեղեցին մարամաթի շինեց»<sup>30</sup>, Եկեղեցու հաջորդ վերանորոգման մասին է վկայում նրա գմբեթի շրջանագծի վրա (ներսից) պահպանվող արձանագրությունը: Վերջինս գրված է սև ներկով և խոշոր գլխատառերով՝ սպիտակ ֆոնի վրա: Հստ արձանագրության.

Կառուցաւ հռ(յ)ակապ եւ հրաշագան. եւ վա(յ)ելուլ երեք բեմեա  
ս(ուր)բ եկեղեցիս յանուն ամենաս(ուր)բ (Աստվածածնի)ն եւ  
ս(ուր)բ Մկրտչի. եւ ս(ուր)բ Նախավկայի. ի ՌՃԺԲ (1663) թվին.  
Իսկ ՌՃԼԵ (1686) ա(մ)ին գա[ն]եցաւ: Եւ ի ՌՃԾԲ (1703) թ(վ)ին  
գաւր(ա)նալի կաթուղիկէս շինեցաւ ի փառս Ք(ր)ի(ստոս)այ<sup>31</sup>:

Այս արձանագրությունը լրացվում և հաստատվում է Ձ. Ագուլեցու ճշգրիտ արձանագրած տեղեկություններով<sup>32</sup>: Ամենայն հավանականությամբ այս վե-

<sup>30</sup> Ձ. Ագուլեցի, նշվ. աշխ., էջ 141:

<sup>31</sup> Այս արձանագրությունը որոշ տարբերություններով հրատարակել է Ե. Լալայանը (նշվ. աշխ., էջ 65): Նա եկեղեցին գաղելու տարեթիվն ընդօրինակել է ՌՃԼԸ, որը ճիշտ չէ: Ինչպես Ձ. Ագուլեցին է վկայում, այն գաղվել է ՌՃԼԵ (1686) թվականին (էջ 65):

<sup>32</sup> Ձ. Ագուլեցի, նշվ. աշխ., էջ 63—65, 130:

րանորոգման ժամանակ էլ (1663 թ.) կառուցվել են եկեղեցու օժանդակ շինությունները: Այս մասին Ջ. Ագուլեցին նշում է. «պարիսպն քաշեցին, թէ խուց, թէ սեղանատուն շինեցին, ապա պրծաւ»<sup>33</sup>, եկեղեցու արևելյան ճակատի պատի տակ, հարավ-հյուսիս առանցքով, կառուցված է եկեղեցու սեղանատունը, որը միադահլիճ-միանավ հորինվածքով շինություն է: Այժմ ավերված են այդ սեղանատան արևելյան որմի առանձին հատվածները, ինչպես նաև մուտքերը, ծածկի մեջտեղի հատվածը: Ս. Հովհաննես-Մկրտիչ եկեղեցու սեղանատան մուտքերը տեղադրված են եղել արևելյան ճակատում, որի ավերակ որմում նկատելի են լուսամուտների հետքեր ևս: Սեղանատան ինտերյերը ունի մոտ 2,7 մ բարձրություն և սվաղված է: Ընդերկայնական արևմտյան որմում ունի քառակուսի բացվածքներով բավականին խոր 9 որմնախորշեր:




Նկ. 8, Ագուլիսի ս. Հակոբ-Հայրապետ եկեղեցին:

Սեղանատան հյուսիսային ճակատին կցված է նրա ծածկի բարձրությամբ հավասար, արևմուտք-արևելք առանցքով թաղածածկ մի փոքրիկ շինություն, որը հանդիսացել է սեղանատան խոհանոցը: Այս խոհանոցին կից է եկեղեցու թաղածածկ աղբյուրը: Ս. Հովհաննես-Մկրտիչ եկեղեցու պարիսպներից ներս, նրա սեղանատան առջև և եկեղեցու հյուսիսային մասում եղել է եկեղեցու գերեզմանատունը, ուր կան XVII—XX դդ. արձանագիր մի շարք տապանաքարեր:

Ագուլիսի ս. Հակոբ-Հայրապետ եկեղեցու հիմնադրման մասին պատմական աղբյուրներում տեղեկություններ չկան: Այդ եկեղեցին (նկ. 8), որը դեռևս կանգուն է, կառուցված է քառանկյունի պարսպի մեջ: Ս. Հակոբ-Հայրապետը փոքրածավալ գմբեթավոր դահլիճի հորինվածքով հուշարձան է՝ կառուցված թրծած աղյուսով, իսկ առանձին մասերում՝ սրբատաշ քարերով:

<sup>33</sup> Նույն տեղում, էջ 130:

Եկեղեցու հորինվածքը (նկ. 9) բաղկացած է աղոթասրահից և արևելյան մասում ուղղանկյուն խորանից: Արևմտյան և հարավային ճակատներում ունի մուտքեր: Ծածկի համարյա մեջտեղում՝ աղոթասրահի երկու զույգ որմնամույթերի միջև ձգված կամարների վրա, բարձրանում է վեց բարձր ու լայն պատուհաններով աղյուսաշար գմբեթը: Եկեղեցու ինտերյերը ծեփված է և ունեցել է որմնանկարներ:



Նկ. 9. Ագուլիսի ս. Հակոբ-Հայրապետ եկեղեցու հատակագիծը (շափաղրությունը Ա. Այվազյանի):

Ս. Հակոբ-Հայրապետ եկեղեցու ուղղանկյուն խորանը երկհարկանի է: Առաջին հարկը ուղղանկյուն ավանդատուն է, որը հյուսիսային և հարավային որմերում ունի մեկական քառակուսի բացվածքներով որմնախորշեր: Խորանում որմնախորշեր չկան և նրա լուսավորումն իրականացված է արևելյան որմում գտնվող լուսամուտով: Խորանի առաջին հարկի մուտքը բացված է բեմի հյուսիսային անկյունում՝ երկրորդ հարկ բարձրացող աստիճանների տակից:

Ս. Հակոբ-Հայրապետի գմբեթատակ շրջանագծի վրա դեռևս պահպանվող արձանագրությունը, որը գրված է սև ներկով, վկայում է, որ

Վերա[շ]ինեցաւ սուրբ Յակոբ-Հայրապետ. եկեղեցիս կաթողիկոսութեան Հայոց. Մկրտիչի Առաջինի 1901 թ(վ)ին. Բնթացս. վեց ամսոյ:

Հետևապես, ս. Հակոբ-Հայրապետի աշտմյան կանգուն շինությունը, որը հետաքրքիր ճարտարապետական լուծումներ ունեցող հուշարձան է, նորոգվել է 1901 թ.: Նախկին շինությունը կառուցված է եղել ավելի վաղ շրջանում:

Ագուլիսի Վերին գետ թաղամասում, լեռնալանջի հարթ փնջին բազմել է այդ թաղամասի եկեղեցին՝ ս. Ստեփանոսը, որի անցյալի մասին շատ քիչ տեղեկություններ են պահպանվել: Կարելի է ենթադրել, որ այս եկեղեցու նախկին շինությունը կառուցված է եղել ավելի վաղ դարերում և Ագուլիսի մյուս հուշարձանների հետ միասին վերանորոգվել է XVII դ.: Այս եկեղեցին վերանորոգվել է նաև 1845 թ., ագուլեցի մահտեսի Հովհաննես Տէր-Ջանյանի միջոցներով<sup>34</sup>:


Ս. Ստեփանոս եկեղեցին (նկ. 10) կառուցված է մաքուր տաշած բալալտով և սրբատաշ կարմրերանգ քարերով: Ունի քառամույթ գմբեթավոր բա-

<sup>34</sup> Ե. Լալայան, նշվ. աշխ., էջ 64:

զիլիկայի հորինվածք (նկ. 11), որը իր արևելյան մասում, ավագ խորանի երկու կողմերում ունի մեկական կիսաշրջանաձև խորաններ ևս, որոնց արև-



Նկ. 10. Ագուլիսի ս. Ստեփանոս եկեղեցին:



Նկ. 11. Ագուլիսի ս. Ստեփանոս եկեղեցու հատակագիծը (չափագրությունը Ա. Ալվադյանի):

մըտլան ճակատները գլխավոր խորանի նման ռաց են և կապված են աղոթասրահի հետ: Խորանների տակ կան նկուղային հարկեր-ավանդատներ, որոնց մուտքերը ռացված են բեմի ճակատային մասից և իջնում են դեպի ներքև:

Ս. Ստեփանոս եկեղեցու քառակուսին հիմքերով շորս խաչաձև կտրվածքով մույթների վրա ընկած է քարակերտ գմբեթը: Եկեղեցին իր հյուսիսային, հարավային և արևմտյան ճակատներում ունի մուտքեր, որոնք երկված են դեղեցիկ և ձևավոր քանդակադարձերով: Մասնակին այդ մուտքերի կամարների տակ տեղադրված են եղել ընդհանրապես կանգնած: Եկեղեցու հարավային մուտքի առջև կառուցված է եղել երկու մույթների հորինվածքով եռահարկ դանդակատուն, որն ավերվել է 1930-ական թվականներին: Ս. Ստեփանոս եկեղեցու օժանդակ և կոմունալ շինություններն առնված են եղել այժմ ավերված քառակուսին պարսպի մեջ:

Ագուլիսի ճարտարապետական հուշարձանները հայ ճարտարապետության աչքի ընկնող կառույցներից են: Դրանք լրացնում են Հայաստանի ճարտարապետական համալիրների ամբողջական պատմությունը և կարևոր են միջնադարյան հայ ճարտարապետության առանձնահատկությունների ուսումնասիրման համար:

## АРХИТЕКТУРНЫЕ ПАМЯТНИКИ АГУЛИСА

АРГАМ АЙВАЗЯН

### Резюме

Средневековый армянский город Агулис находился недалеко от города Ордубада (Нах. АССР). Агулис славился двенадцатью архитектурными памятниками: монастырями и церквями, такими, как монастырь св. Товмы, церкви св. Христофора, св. Шмавона, св. Ованес-Мкртича, св. Акопа-Айрапета, св. Степаноса, которые являются важными архитектурными памятниками армянского средневекового зодчества.